

Bendera Umno 'Sang Saka Bangsa' Tiba Di Selangor
Bernamea
08 Mei, 2012

HULU LANGAT, 8 Mei (Bernama) -- Bendera 'Sang Saka Bangsa' yang diarak dari Johor sejak 1 Mei lepas di bawah program larian bendera sempena sambutan ulang tahun Umno ke-66, tiba di Selangor Selasa.

Bendera Umno itu diarak Pengerusi Badan Perhubungan Umno Negeri Sembilan Datuk Seri Mohamad Hasan dari sempadan negeri tersebut di Lenggeng dekat sini hingga ke Klinik Kesihatan Beranang.

Mohamad, yang juga Menteri Besar Negeri Sembilan, bersama rombongannya tiba di pekarangan klinik itu pada 6.30 petang dan disambut Timbalan Pengerusi Badan Perhubungan Umno Selangor Datuk Seri Noh Omar.

Mohamad berkata bendera parti itu diarak ke seluruh Negeri Sembilan sejak diterima pada 5 Mei lepas di Tanjung Agas, di sempadan Negeri Sembilan-Melaka, daripada Pengerusi Badan Perhubungan Umno Melaka dan Ketua Menteri Datuk Seri Mohd Ali Rustam.

Beliau berkata sambutan orang ramai, terutama masyarakat Melayu semasa larian bendera Umno itu berlangsung di Negeri Sembilan, amat memberangsangkan.

Dalam pada itu, Noh berkata bendera Sang Saka Bangsa yang diserahkan itu akan diarak ke lokasi seperti Pandan, Ampang, Serdang, Puchong dan Shah Alam.

Beliau berkata selain daripada penyerahan di Beranang, bendera Umno yang diarak dari Sabah akan disambut Umno Selangor di Lapangan Terbang Antarabangsa KL.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=664673>